

**TEZAUUR LITURGIC**  
**20 DECEMBRIE**

**ACATISTUL**  
**SF.PREOT**  
**IOAN SERGHIEV**  
**DE LA**  
**KRONSTADT-**  
**ST.PETERSBURG**  
**II**



**MOSCOVA, 2000**



# **Акафист**

## **святому праведному Иоанну**

### **Кронштадтскому, чудотворцу**

#### **Кондак 1**

---

Избранного и верного во иереех Божиих восхваляем тя, богоносне отче Иоанне! Ты бо Евангельской Истине последуя, Христу всем сердцем сораспялся еси, струю чудес и исцелений всем верным источаеши и ко спасению их направляеши. Мы же, молитвами твоими в вере, надежде и любви укрепляеми, благодарно зовем ти: Радуйся, Иоанне, земли Российския молитвенниче предивный.

#### **Икос 1**

---

Ангела молитвы и проповедника покаяния ведаем тя, блаженне отче. Ходатайствуеши бо за нас у Престола Божия, да в разум истинный приидем и жизнь свою на путь спасения направим, взывая тебе:

Радуйся, благодати Божия сосуде избранный; радуйся, Премудрость Божию, яко млеко матери, сладостно впитавый.

Радуйся, Ангелу хранителю твоему, яко Товия древле, вседушевно последовавый; радуйся, боголюбивых родителей целомудренный плод чистоты непререкаемый.

Радуйся, в повиновении родителям своим благословение Божие стяжавый; радуйся, от юности твоея водительству Духа Святаго прилежавый.

Радуйся, всем сердцем твоим Бога возлюбивый; радуйся, в меру возраста Христова богомудренно возраставый.

Радуйся, Иоанне, земли Российския молитвенниче предивный.

## **Кондак 2**

---

Предвидя, яко многия беды и соблазны грядут на Церковь Русскую и чада Божии в смятении будут, яко пастырь добрый, душу свою за паству свою готовый положить, глагола еси людям: «Убойтесь соблазнов, стойте в вере Православной, мужайтесь, и крепитесь, и славьте Господа, взывая Ему: Аллилуиа».

## Икос 2

Разумом Божественным просвещаемый,  
богословия струи животочныя источил еси,  
всеблаженне отче Иоанне, в посте и молитве  
слова Божия со слезами в сердца верных сея,  
к свету истиннаго богопознания чад земли  
нашея призывал еси. Тии же, в любви Божии  
укрепляющиеся, пояху тебе таковая:

Радуйся, Евангельския Истины пламенный  
ревнителю; радуйся, глаголов жизни вечныя  
неумолкаемый возвестителю.

Радуйся, равноангельным житием твоим  
достойно украшенный; радуйся, у Престола  
Божия о людях ходатаю верный.

Радуйся, от юности Церкви Христовой всем  
сердцем прилепивыйся; радуйся, Христу  
сораспятися о людях вседушевно возгоревыйся.

Радуйся, любовью Христовою сердце твое,  
аки ниву благоплодную, возделавый; радуйся,  
людям, в скорбех и печалех изнемогшим,  
состраданием и молитвою облегчение  
подававый.

Радуйся, Иоанне, земли Российския  
молитвенниче предивный.

## Кондак 3

---

Силою Божественных благодати, яко углем горящим у жертвенника Божия возжжен, светильниче многосветлый во граде Кронштадте просиял еси, отцев наших похвало, отче Иоанне. Сице бо во тьме греховней обуреваемых и соблазном богоборчества колеблемых зарею Божественного разума просветил еси и научил еси пети: Аллилуиа.

## Икос 3

---

Имея любовь велию к людем, Кровию Сына Божия искупленным, потекл еси к неимущим благочестия, трезвения и страха Божия и отчаянием обуреваемым, пастырю добрый Иоанне, сих же кротостию и смиреномудрием покорив Христу, научил еси благодарно взывати тебе таковая:

Радуйся, сущих во тьме и сени смертней премудрый просветителю; радуйся, о спасении людей, в пучине греховней обуреваемых, благостный попечителю.

Радуйся, неведущих Бога и окамененных сердцем к покаянию пробуждая; радуйся,

Божественною премудростию в писаниях твоих нас озаряй.

Радуйся, сердце строптивых и злонаправных благодатное умягчение; радуйся, ленивых и коснеющих совестью щедролюбивое обличение.

Радуйся, Слова Божия и правды Его проповедниче неустрашимый; радуйся, житием благонравным козни духов злобы поднебесных победивый.

Радуйся, Иоанне, земли Российския молитвенниче предивный.

#### **Кондак 4**

---

Бурю злонаравия воздвигаему на Церковь нашу Святую ведал еси, отче Иоанне, яко верный страж дома Господня, научал еси овцы Христовы бдети и право ходити в истенней вере и в заповедех Господних непорочно пребывать, да чистым сердцем и усты непрестанно взывают к Богу победную песнь: Аллилуиа.

#### **Икос 4**

---

Слышаще о тебе, яко ты еси сосуд избранный и благодатных даров преисполненный, подвигов милосердия и нищелюбия ревнитель, вдов и сирот, страждущих и обремененных утешитель и

о нераскаянных грешниках молитвенник  
слезный, не токмо от Кронштадта, но и от всех  
конец земли потекоша к тебе людие Божии,  
исцеления от тебе получаху. С ними же и мы, о  
гресех своих кающиеся, яко ходатаю о нас пред  
Богом теплу, умильно зовем ти:

Радуйся, сеятелю правды, слезами твоими  
землю нашу освятивый; радуйся, обличителю  
неправды, души верных от прелести греховных  
свободивый.

Радуйся, свете сердец кротких и разумных,  
путь к Богу указуяй; радуйся, ученьми твоими,  
яко кормилица кроткая, нас греяй и питаяй.

Радуйся, всех скорбящих и обремененных  
неложное упование; радуйся, болящих и от  
духов злых страждущих благодатное  
врачевание.

Радуйся, сосуде избранный, дары Духа  
Святаго туне верным источивый; радуйся, не о  
людех токмо, но и о скотех милосердовавый.

Радуйся, Иоанне, земли Российския  
молитвенниче предивный.



## Кондак 5

---

Яко небосветлая звезда священнолепным житием твоим просиял еси, пастырю Христов Иоанне! Богом дарованное тебе наследие от волков, губящих е, словом Божиим ограждал еси, пастырски взывая: возьмите Крест Господень, на Нем же Христос Царь Славы рукописание грехов наших изгладит, в Нем же миру востание во веки. Мы же, сим знаменуящиеся, поем с тобою Богу победную песнь: Аллилуиа.

## Икос 5

---

Видевше тя Российстии людие дивно на свещнице церковней сияющая, правды Божия ищущие, к тебе притекаху, и яко другу Христову, исповедаху грехи своя. Мы же, обремененнии многими прегрешениями, к тебе, блаженне Иоанне, прибегаем и тако глаголем:

Радуйся, яко силою благодати, яже в тебе, немощнии духом в любви Божии укрепляются; радуйся, яко твоими молитвами кающиеся плена греховнаго свободжаются.

Радуйся, яко труды твоими алчущии и жаждущии Правды Христовой насыщаются;

радуйся, яко благовестием твоим врази Христовы посрамляются.

Радуйся, яко молитвами твоими силы ада содрагаются; радуйся, яко воздеянием рук твоих, врата небесная верным отверзаются.

Радуйся, в умилоствление за народ наш молитву, яко кадило благовонное, херувимски Богу приносивый; радуйся, за неведущих правды и любви Божия молиться нас подвигнувый.

Радуйся, Иоанне, земли Российския молитвенниче предивный.

### **Кондак 6**

---

Проповедницы чудных деяний твоих, блаженне Иоанне, явишася мнози: богатии и нищии, старцы и юноши. Ты бо всем любовь свою изливал еси. Темже не токмо православнии, но и иновернии силою молитв твоих милость Божию обретаху, поя Богу: Аллилуиа.

### **Икос 6**

---

Возсиял еси житием твоим в Церкви Православней лучезарнее сияния северного, светом Евангелия Христова Отечество наше

просвещал и от сетей вражиих чада ея ограждал. Темже и ныне молим Господа Сил, да любовь святая утвердится в сердцах наших, во еже ни скорбь, ни теснота, ни смерть не возмогут нас разлучить от любви Божия. И тако достигше сего, тебе воззовем:

Радуйся, яко Божиим смотрением грядущая на ны предвозвестивый; радуйся, тесным путем в заповедех Божиих ходити нас научивый.

Радуйся, в скорбех и печалех сущим источник радости в Бозе указавый; радуйся, оную радость, яко зеницу ока, свято хранить нам завещаваый.

Радуйся, десницею и шуйцею оружие Правды Божия содержаваый; радуйся, в словесе истины и любви нелицемерней Сыну Грому уподобивыйся.

Радуйся, порфиною покаяния всех облакаяй; радуйся, диадимою благодати славно увенчанный.

Радуйся, Иоанне, земли Российския молитвенниче предивный.

## Кондак 7

---

Хотя Всеблагий Господь спасти люди земли  
нашея и, яко злато в горниле огненнем,  
очистити я, вложи в уста твоя, всеблаженне, дух  
премудрости и разум провидца, во еже чрез  
покаяние сердечное и сокрушение слезное  
преуготовити я, в вере непоколебимых, к  
жертвенному служению, да со всеми святыми, в  
земле Российстей просиявшими, ангельски  
вопиют Богу: Аллилуиа.

## Икос 7

---

Новаго избранника Божия, всеблаженне  
Иоанне, ведяще тя у Алтаря Господня за всех  
молитвою слезною Христу сраспинающася,  
боголюбивии людие с верою к тебе притекаху и  
душевные и телесные исцеляхуся. Темже и мы, в  
немощи сущии, молим тя прилежно: воздвигни  
руце твои и не премолчи за ны ко Господу,  
якоже отец о чадах своих, да умножит Господь  
милость Свою на нас, приносящих ти сицевая:

Радуйся, у Престола Божия прилежный о нас  
печальниче и ходатаю; радуйся, покаяния  
слезного усердный глашатаю.

Радуйся, образе неусыпнаго делания, Христу Богу работати прилежно нас наставляеши; радуйся, яко на Божественней страже веры апостольския стояти нас утверждаеши.

Радуйся, образ воздержания и целомудрия добре показавый; радуйся, суеверия, ереси и злохуления от стада твоего отсекавый.

Радуйся, сущих во тьме неведения славный просветителю; радуйся, душ человеческих от суеты житейския мудрый восхитителю.

Радуйся, Иоанне, земли Российския молитвенниче предивный.

### **Кондак 8**

---

Странное чудо видим на тебе, предивный пастырю Христов Иоанне! Сама бо Пречистая Матерь Божия ублажи тя и последующих тебе и с радостию благоволение Божие всем возвести: о милейшие вы чада Отца Небеснаго! Сице бо радость Церкви Небесныя о подвиге земныя предвозвести. Сего ради и мы, надеждею на предстательство о нас Матери Господа Сил согреваемы, вопием Царю всех веков: Аллилуиа.

---

## Икос 8

Весь желанием Божиим распаляем, носитель любви Христовы явился еси, пастырю добрый. В ней бо милость и истина сретостася, правда и мир облобызастася; всякая же лесь упразднися, еретическое же злонравие, яко тля, попалися, скорби же человеческия елеем милосердия твоего утолишася. Мы же, нерадивии, сокровищсех не стяжахом, праведным судом Божиим многим скорбем и печалем достойни явихомся. Но, ведущая твоя помощника неусыпна, умильно зовем ти:

Радуйся, любви Христовой неутомимый носителю; радуйся, мира и правды ревностный сеятелю.

Радуйся, веры православныя незыблемый хранителю; радуйся, благочестия и добронравия насадителю.

Радуйся, о всем мире печальниче и слезный молитвенниче; радуйся, Церкви Христовой немеркнувший светильниче.

Радуйся, отцев наших похвало, нам же надежду и утешение; радуйся, Богоизбранный пастырю, Святыя Руси благодатное украшение.

Радуйся, Иоанне, земли Российския  
молитвенниче предивный.

### **Кондак 9**

---

Всем сущим в бедах и скорбех житейских  
воздвиже Господь на радость пастыря и  
чудотворца предивна Иоанна, да хромые и  
расслабленные, слепые и от духов злых томимые  
исцелит, в пагубном пьянстве и супружестей  
неверности растлеваемые к непостыдней жизни  
призовет, а яже во озлоблении сущия к Богу  
приведет и сие в душах верных царство  
Правды Божия насадит, да воспоем вси  
спасительную песнь Богу: Аллилуиа.

### **Икос 9**

---

Витии многовещаннии недоумеют изъяснити  
силу молитвы твоея, Иоанне предивне, егда три  
юноши, дерзнувши поглумитися о тебе и  
молитве твоей, спасительне наказал еси. Узрев  
же я кающихся и слезно молящихся, исцеление  
злохулителю от Бога испросил еси. Тии же,  
познавше молитвы твоея силу чудодейственную  
и любве твоея милосердие теплейшее, яко Божия  
провидца, ублажиша тя похвалами таковыми:

Радуйся, благое икономство чина своего богомудренно соблюдый; радуйся, данный тебе залог, Тело Христово, цел и невредим до последняго твоего издыхания сохранивый.

Радуйся, скрижали Богоначертанныя обою Заветов достойне возвестивый; радуйся, Церковь Христову благочестием пастыря добра прославивый.

Радуйся, истиннаго просвещения и христианскаго благочестия ревностный насадителю; радуйся, кающихся грешников, сирых и убогих милостивый покровителю.

Радуйся, мудрый путеводителю, стези правды юным указуяй; радуйся, судие нелицеприятный, зломудрствующия любовью наказуяй.

Радуйся, Иоанне, земли Российския молитвенниче предивный.

### **Кондак 10**

Спасти хотя души ближних своих, ересьми и маловерием обуреваемая, противу кознем диавольским воздержанием и смирением вооружился еси, отче Иоанне, апостольское и святоотеческое веры исповедание твердо сохранив. Жертвенною же любовью Христу



сраспинаясь, душу твою за спасение народа Божия положив, Царствия Небеснаго достигл еси, идеже со Ангелы и лики святых непрестанно Бога славословя, поминай нас, славную память твою празднующих и поющих Богу: Аллилуиа.

## Икос 10

---

Стена твердая бысть любовь твоя ко Господу, в ней же утвердися сердце твое, богоносне отче Иоанне. Сего ради всем, притекающим к тебе с верою, прибежище и утверждение явился еси, да всяческая Христу приобрящеши. Темже и нам, к тебе припадающим, буди стена крепка и ограждение непреодолимое, да не посмеются о нас, хотящая нам злая, во еже в мире и любви Христове пребывать и приносить сия похвалы:

Радуйся, светильниче неугасимый, огнем Духа Святаго возжженный; радуйся, крине, присно благоухай, росой благодати Божия напоенный.

Радуйся, росо сладкоплодная, благодатными дары верных оживотворяющая; радуйся, соле земли, от греховнаго тления нас сохраняющая.

Радуйся, в море житейском обуреваемым тихое пристанище; радуйся, яко душевне и телесне изнемогающим о помощи Божией умоляеши.

Радуйся, сердцеведче предивне, верныя от лжемудрствования ограждаяй; радуйся, силою молитвы чистыя союз супружеския верности укрепляяй.

Радуйся, Иоанне, земли Российския молитвенниче предивный.

### **Кондак 11**

---

Песнь достохвальную приносим ти, всеблаженне отче Иоанне, всем житием твоим прославившему Бога. И якоже видехом тя на земли долу у Престола Господня за всех и за вся Владыку мира умолявшего, сице и ныне на Небеси горе вознеси молитвы твоя, во еже непоколебимей быти Церкви нашей, да из рода в род в Отечестве нашем благочестно славится Имя Троидинаго Бога поющими Ему: Аллилуиа.

### **Икос 11**

---

Светозарную свещу, во мраке жития сущим, зрим тя, Богом избранне отче Иоанне, ты бо на Небесех у Престола Божия в сонме святых и Сил

Небесных о нас присно ходатайствуеши, воззри на нас, чадо твоих, облегчи наша скорби и исцели наша недуги, да зовем ти:

Радуйся, яко в подвиге твоём Имя Пресвятыя Троицы дивно прославися; радуйся, яко благочестием веры твоя Церковь Христова украсися.

Радуйся, яко состраданием к ближним твоим скорби, и болезни, и печали всяческия утешаются; радуйся, яко молитвами твоими кающияся грешницы Царствию Небесному приуготовляются.

Радуйся, спасительных благ земных и небесных щедрый подателю; радуйся, от враг видимых и невидимых надёжный избавителю.

Радуйся, яко в земном Едеме, Церкви Христовой, подвигом добрым просиял еси; радуйся, яко доброты райския, уготованная праведным, восприял еси.

Радуйся, Иоанне, земли Российския молитвенниче предивный.

### **Кондак 12**

Благодатных даров Духа Святаго кладёзь преисполненный яви в тебе Господь, отче наш

Иоанне, да тобою и мы сих причастницы будем и тако познаем милость Божию к нам, яко не отступит, ниже посрамит нас Господь, егда благодарными усты и чистым сердцем, уповающе на милость благоутробия Его, воспоем Ему: Аллилуиа.

## Икос 12

---

Поюще твое достохвальное житие на земли и славу, юже стяжал еси на Небеси, молим тя, блаженне Иоанне, вознеси о нас молитвы Богу, да помиловани будем в день судный и, спасаеми твоими молитвами, тако тебе воззовем:

Радуйся, богоизбранне и богопрославленне пастырю земли Российския; радуйся, яко воспел еси имя Божие, аки орган мусикийский.

Радуйся, пророком и апостолом добре поревновавый; радуйся, бежати гнева Божия и творити плоды покаяния мудре наставивый.

Радуйся, об Отечестве и народе нашем теплый молитвенниче; радуйся, веры православныя истинный исповедниче.

Радуйся, пресветлый лучу, путь к жизни вечней осиявая; радуйся, неисчерпаемую благодать Божию нам открывая.

Радуйся, трапезо неоскудеваемая, от неяже монаси и мирстии питаются; радуйся, учителю Правды Божия, еюже старцы и юноши украшаются.

Радуйся, яко ихже даде тебе Господь, сотворил еси я Богу в радование; радуйся, яко от небожителей приял еси о Господе целование.

Радуйся, Иоанне, земли Российския молитвенниче предивный.

### **Кондак 13**

---

О всеблаженне отче Иоанне, всероссийский пресветлый светильниче и предивный чудотворче! Приими хвалебное сие пение и умоли Христа Бога в мире и благочестии утвердить Святую Церковь, нас же всяких бед избавити и в единомыслии веры в союзе любви Христовы соблюсти, да единеми усты и едином сердцем воспоем с тобою Богу: Аллилуиа.

Этот кондак читается трижды, затем 1-й икос «Ангела молитвы...» и 1-й кондак «Избранного и верного...».

### **Молитва первая**

---

О великий угодниче Христов, святой праведный отче Иоанне Кронштадтский,

пастырю дивный, скорый помощниче и милостивый предстателю! Вознося славословие Триединому Богу, ты молитвенно взывал:

Имя Тебе - Любовь: не отвергни меня, заблуждающегося.

Имя Тебе - Сила: укрепи меня, изнемогающего и падающего.

Имя Тебе - Свет: просвети душу мою, омраченную житейскими страстями.

Имя Тебе - Мир: умири мятущуюся душу мою.

Имя Тебе - Милость: не переставай миловать меня.

Ныне благодарная твоему предстательству всероссийская паства молится тебе: христоименитый и праведный угодниче Божий!

Любовию твоею озари нас, грешных и немощных, сподоби нас принести достойные плоды покаяния и неосужденно причащаться Святых Христовых Тайн. Силою твоею веру в нас укрепи, в молитве поддержи, недуги и болезни исцели, от напастей, врагов видимых и невидимых избави.

Светом лика твоего служителей и предстателей Алтаря Христова на святых

подвиги пастырского делания подвижни,  
младенцем воспитание даруй, юность настави,  
старость поддержи, святыни храмов и святыя  
обители озари!

Умири, чудотворче и провидче  
преизряднейший, народы страны нашея,  
благодатию и даром Святаго Духа избави от  
междоусобныя брани, расточенныя собери,  
прельщенныя обрати и совокупи Святей  
Соборней и Апостольстей Церкви.

Милостию твоею супружества в мире и  
единомыслии соблюди, монашествующим в  
делах благих преуспеяние и благословение  
даруй, малодушныя утеши, страждущих от  
духов нечистых свободи, в нуждах и обстояниях  
сущих помилуй и всех нас на путь спасения  
настави.

Во Христе живой, отче наш Иоанне, приведи  
нас к Невечернему Свету жизни вечныя, да  
сподобимся с тобою вечнаго блаженства,  
хваляще и превозносяще Бога во веки веков.  
Аминь.

## Молитва вторая

О великий чудотворче и предивный угодниче Божий, богоносне отче Иоанне! Призри на нас и внемли благосердно молению нашему, яко великих дарований сподоби тя Господь, да ходатаем и присным молитвенником за нас будеши. Се бо страстьми греховными обуреваемы и злобою снедаемы, заповеди Божия пренебрегохом, покаяния сердечнаго и слез воздыхания не принесохом, сего ради многим скорбем и печалем достойни явихомся.

Ты же, отче праведный, велие дерзновение ко Господу и сострадание к ближним своим имея, умоли Всещедраго Владыку мира, да пробавит милость Свою на нас и потерпит неправдам нашим, не погубит нас грех ради наших, но время на покаяние милостивно нам дарует.

О, святче Божий, помози нам веру православную непорочно соблюсти и заповеди Божии благочестно сохранить, да не обладает нами всякое беззаконие, ниже посрамится Правда Божия в неправдах наших, но да сподобимся достигнути кончины христианския, безболезненная, непостыдная, мирная и Таин Божиих причастная.



Еще молим тя, отче праведне, о еже Церкви нашей Святей до скончания века утвержденней быти, Отечеству же нашему мир и пребывание испроси и от всех зол сохрани, да тако народы наши, Богом храними, в единомыслии веры и во всяком благочестии и чистоте, в лепоте духовнаго братства, трезвении и согласии свидетельствуют: яко с нами Бог! В Нем же живем и движемся, и есмы, и пребудем во веки. Аминь.



**ПОЛНЫЙ  
АКАФИСТНИК  
КАНОНИЧЕСКИЙ**

**АКАФИСТЫ  
КО ГОСПОДУ БОГУ  
ПРЕСВЯТОЙ  
БОГОРОДИЦЕ  
АРХАНГЕЛАМ  
И АНГЕЛАМ**



**ИСКРЕ  
\*НЕБО**